

Jungedi, dor is hüüt ja wedder bannig wat los op den Bolzplatz! Paul un Emma speelt mit de annern Kinner. De Jung is teihn Jahr oolt, de Deern is negen. Tüffel, ehr lütt Hund is ok dorbi. Dat Wedder is schön, de Fröhjohrsluft is al recht warm un de eersten acht gelen Botterlicker sünd ok al ünnerwegens. Se söökt den Nektar in de vigeletten Blöten vun den Sommerflederbusch. „Lecker, lecker“! Emma un Paul kiekt to un freut sik.

Veer anner Kinner speelt Football op den grönen Rasen. Jan is de Doorwart. He hett den swart-witten Ball fungen. De Annern heet Marie, Philip un José. Se hebbt hüüt gele, rode un blaue Hemden mit korten Arm an.

De Familie vun José is ut Spanien. Aver se leevt al 30 (dörtig) Jahr in Düütschland. Sien Vadder arbeitet in de Grootstadt bi en Bank. Sien Modder is Schoolmeistersch in de Grundschool. José kann Düütsch, Spaansch un Plattdüütsch snacken.

Tüffel will ok Football spelen. Sien Ball is geel un root. Achteran giff dat en paar Hunnenknaken för em.

Paul un Emma hebbt hüüt beid blaue Buxen an. Aver Emma driggt en gröön Hemd un Paul en blau Hemd.

Dat nie'e Swedenhuus op de rechte Siet is root mit en gele Döör un en gries-swart Dack. Dor wahnt Philip mit sien Familie. Sien brune Katt heet Mieze un hett veer lütte Kellings. De Kattenfamilie speelt vergnöögt op den Rasen vör't Huus un kiekt bi dat Footballspelen to.

Op de linke Siet steiht dat groot Huus, wo Paul un Emma wahnt. Dat is mit rode un gele Farv anmaalt. Dorvör staht twee Autos, een is root. De anner Wagen is gröön. Dat rode Auto höört de Öllern vun José to. Bald wüllt se dormit na Spanien fohren un Oma un Opa besöken.